

Datum: 28.05.2021.

Broj: 02-06-841

Za dvije godine BiH ispunila samo jedan od 14 prioriteta EU, evropski put potpuno blokiran

Sarajevo, 28.05.2021. – Za dvije godine Bosna i Hercegovina ispunila je tek jedan od 14 prioriteta koje mora da ispuni na evropskom putu, svi drugi procesi su potpuno blokirani a opstruiše se usvajanje ključnih zakona koji bi doprinijeli vladavini prava i borbi protiv korupcije. To je glavna poruka sa konferencije *“Dvije godine poslije: Mišljenje Komisije o zahtjevu BiH za članstvo u EU”* koju je organizovao Transparency International u BiH (TI BiH) povodom druge godišnjice od izdavanja Mišljenja Evropske komisije o zahtjevu BiH za članstvo.

TI BiH je na konferenciji predstavio izvještaj koji pokazuje da je BiH za dvije godine uspjela samo da formira Parlamentarni odbor za stabilizaciju i pridruživanje koji je usvojio poslovnik o radu, tako da su samo stvorene formalne pretpostavke za ispunjavanje ovog prioriteta.

-Sve ostalo iz mišljenja Evropske komisije nije realizovano u cjelini a osim pitanja koja se tiču izmjena ustava i oko kojih nije moguće postići politički dogovor, potpuno je evidentno da vlasti u paketu opstruišu i rješavanje pitanja koja bi osigurala prevenciju korupcije i borbu protiv organizovanog kriminala za šta ne postoji opravdanje. Ono što brine su sistemske opstrukcije i nastojanja da se izbjegne svrha donošenja ovih zakona kroz brojne pokušaje da se usvoje rješenja koja bi bila gora od postojećih, ocjena je TI BiH.

Ambasadorica Švedske u BiH Johanna Strömquist ocijenila je da je BiH ostvarila jako mali napredak u procesu EU integracija zbog čega trpi posljedice.

-Mladi i talentovani ljudi napuštaju region kako bi se nastanili u EU jer su umorni od korupcije, slabe vladavine prava, sistema obrazovanja i zdravstvene zaštite. Ako bi države Zapadnog Balkana napravile reforme u procesu EU integracija oni bi možda ostali, poručila je Strömquist.

Iz Delegacije EU u BiH kažu da je izostalo usvajanje ključnih reformskih zakona koji bi mogli doprinijeti vladavini prava i borbi protiv korupcije.

-BiH mora uložiti više napora da ubrza evropski put i to u nekoliko konkretnih pitanja. Potrebno je usvojiti Zakon o sukobu interesa, amandmane na zakon o VSTV-u kao i poboljšanje Zakona o javnim nabavkama, poručio je na konferenciji Krassimir Nikolov, šef Sekcije za evropske integracije, politička i ekonomska pitanja, Delegacija EU u BiH.

Takođe, na konferenciji je zaključeno da nisu usvojeni ni zakoni koji bi omogućili provođenje izbora u skladu sa evropskim standardima i preporukama OSCE-a/ODIHR-a i Venecijanske komisije. Tu se takođe pod izgovorom neriješenih ustavnih pitanja izbjegavaju izmjene izbornog zakonodavstva koje bi onemogućile izborne prevare, krađu glasova, zloupotrebu javnih resursa i nezakonito finansiranje političkih partija.

Svega pet prioriteta iz Mišljenja Evropske komisije realizovano je parcijalno ili se počeo ispunjavati, usvojeni su akcioni planovi za reformu javne uprave a BiH je nakon 12 godina uspjela održati izbore u Mostaru. Na konferenciji je zaključeno da je proces integracije BiH u EU suštinski potpuno zaustavljen i ukoliko bi se ovom dinamikom odvijao ispunjavanje 14 prioriteta moglo bi potrajati više decenija.